

आकाशवाणी

खास-खास खबरां:-

1. बदेश मंत्री डाक्टर एस. जयशंकर होरें अज्ज होने आली महत्वपूर्ण खनिजें सरबंधी मंत्री स्तर दी बैठक शा पैहले कल रातीं वांशिंगटन च अमरीका दे बदेश मंत्री मार्को रुबियो हुंदे कन्नै मलाटी कीती।
2. भारत ते किर्गिस्तान बश्कार सांझा फौजी अभ्यास खंजर अज्जै थमां असम दे सोनितुपर जिले च शुरु हो'आ रदा ऐ।
3. रेलमंत्री अश्विणी वैशणव होरें महाराष्ट्र दे पालघर च मुम्बई-अहमदाबाद हाई स्पीड रेल परियोजना दी दुई पहाड़ी सुरंग दे कामयाबी कन्नै बनी जाने दा ऐलान कीता ऐ।
4. बी.जे.पी नेता युष्मास खेमचंद सिंह होरें गी मणिपुर च सब्भनें दी सैहमति कन्नै बी.जे.पी. विधायक दल दा नेता चुनी लेता गया ऐ।
5. महिला प्रीमियर लीग क्रिकेट च दिल्ली कैपिटल्स नै कल गुजरात जायंट्स गी हराइयै फाईनल च थाहर पक्की करी लैती- जित्थे औंदे वीरवारें ओदा मुकाबला रॉयल चैलेंजर्स बेंगलूरू कन्नै होगा।
6. Under -19 इक-रोजा क्रिकेट विश्व कप दे दुए सैमीफाईनल च अज्ज भारत दा मुकाबला अफगानिस्तान कन्नै होगा।



Jaishankar –US Visit

बदेशमंत्री डाक्टर एस. जयशंकर होरें अज्ज होने आली महत्वपूर्ण खनिजें सरबंधी मंत्री स्तर दी बैठक शा पैहले कल रातीं वांशिंगटन च अमरीका दे बदेश मंत्री मार्को रुबियो हुंदे कन्नै मलाटी कीती। इक सोशल मीडिया पोस्ट च डाक्टर जयशंकर होरें आखेया जे उनें'गी उन्दे नै मिलियै बड़ी खुशी होई ऐ। उनें आखेया जे दपक्खी सैहयोग एजेडे सनें इलाकाई ते आलमी सतह दे मुद्दे पर उन्दी व्यापक गल्लवात होई ऐ। उनें इब्बी आखेया जे उनें भारत ते अमरीका दी रणनीतिक सांझ-भ्याली दे बक्ख-बक्ख पैहलुएं पर बी चर्चा कीती- जिंदे च बपार-ऊर्जा- परमाणु- रक्षा- महत्वपूर्ण खनिज ते तकनीकां शामिल न। मार्को रुबियो ते डाक्टर जयशंकर होरें अमरीकी राष्ट्रपति डोनाल्ड ट्रम्प ते प्रधानमंत्री नरेन्द्र मोदी हुंदे बश्कार होए दे बपार समझौते दा सुआगत कीता।

जियां जे पैहले बी खबर दिती जाई चुकी दी ऐ जे हुन "मेड इन इंडिया" उत्पादें पर अमरीका दा टेरिफ घटिए 18 प्रतिशत होई जाग। इसी भारत-अमरीका संरबंधें आस्तै महत्वपूर्ण करार दिता जा करदा ऐ। बक्ख-बक्ख मंत्रियें ते सरबंधत धडे इस पैहल दा सोआगत करदे होई आखेया जे टैरिफ घटने कन्नै दोनें देशें बश्कार व्यापार संरबंधें ते आपसी विकास च तेजी आग। एदे इलावा भारत-अमरीका रणनीतिक सांझेदारी गी होर मता बल थहोग।



Military Exercise -Khanjar

भारत ते किर्गिस्तान दे बश्कार सांझे फौजी अभ्यास “खंजर” दा 13मां संस्करण अज्ज असम दे सोनितपुर जिले दे मिसामारी च शुरु होआ’रदा ऐ। एह फौजी अभ्यास- दपकखी रक्षा सैहयोग गी मज़बूत करोग ते दौनें देशें बश्कार लम्मे-समें थमां चलदी आवा’रदी फौजी सांझ-भ्याली गी मज़बूती देग। 14एं दिनें धोड़ी चलने आले इस फौजी अभ्यास दा मकसद दौनें देशें दे बशेश बलें बश्कार आपसी तालमेल ते परिचालन गी बधाना ऐ। अभ्यास दे दरान संयुक्त –राश्ट्र दे हुकमै तैहत शैहरी युद्ध ते आतंकवाद रोधी अभियानें पर चेचा जोर दिता जाहगा। फौजी सूत्तरें मूजब- भारत दी विशिष्ट पैराशूट रेजीमेंट ते किर्गिस्तान दी स्कॉर्पियन ब्रिगेड- Snipping- घुसपैठ- पहाड़ी कौशल ते बशेश आतंकवाद रोधी अभ्यासं जनेह उन्नत कौशलें दा अभ्यास करगंन।



Vaishnav Tunnel Break Through

केन्द्री रेल मंत्री अश्विणी वैष्णव होरें महाराष्ट्र दे पालघर च मुम्बई –अहमदाबाद हाई स्पीड रेल परियोजना दी दुई पहाड़ी सुरंग दे कामयाबी कन्नै बनी जाने दा ऐलान कीता ऐ। एह सुरंग देशें दे महत्वकांक्षी बुलेट ट्रेन कॉरिडोर च इक महत्वपूर्ण मील दा पत्थर ऐ। इस सुरंग दी लम्बाई 454 मीटर ते चौड़ाई 14 इशारिया 4 मीटर ऐ। श्री वैष्णव होरें खरी रफ्तार कन्नै कम्म करने लेई पूरी टीम दी सराहना कीती ते आखेया जे पूरी दुनिया भारत दी हाई स्पीड रेल परियोजना दा गवाह बना करदी ऐ। उनें दस्सेया जे पालघर च दुई पहाड़ी सुरंग बनाने च इक महीने दे अंदर कामयाबी मिली गई ऐ- जिसलै के पैहली कामयाबी इस बरे 2 जनवरी गी मिली ही।



Special Trains

यात्रियें दे भारी रश गी दिक्खदे होई उत्तर रेलवे अज्ज दूए रोज बी श्री माता वैष्णो देवी कटरा ते श्रीनगर बश्कार 2 विशेष रेल सेवा चला करदा ऐ। एह रेलगड्डियां अपने सफर दौरान बनिहाल च रुकगंन। इस पैहल दा मकसद फसे दे यात्रियें दी मदद करना ते नियमित परिवहन सेवाएं च विघ्न पौने दे चलदे आरक्षित ते सुविधाजनक यात्रा गी यकीनी बनाना ऐ। रेलवे अधिकारियें यात्रियें गी सलाह दिती ऐ जे ओहू आरक्षण दी स्थिति ते ट्रेन दे समें दी पैहले सोयां जांच करी लैन कि जे इस दौरान यात्रियें दी मंग मती रौहने दी मेद ऐ। यात्री आधिकारिक रेलवे वेबसाइट, हेल्पलाइन नंबर 139 या राष्ट्रीय ट्रेन पूछताछ प्रणाली दे राएं मती जानकारी हासिल करी सकदे ना।



BJP- Manipur

बी.जे.पी. नेता युम्नास खेमचंद सिंह होरें गी कल मणिपुर च सब्भनें दी सैहमति कन्नै बी.जे.पी विधायक दल दा नेता चुनी लैता गया। उंदा चुनां नमीं दिल्ली आले पार्टी सदर दफ्तर च लगगी दी विधायक दल दी बैठक च होआ। पार्टी दे महासचिव ते मणिपुर च विधायक दल दे नेता दे चुनांs लेई नियुक्त केन्द्री

निगरान तरुण चुगहोरें सोशल मीडिया पर इक पोस्ट च उंदे चुनांऽ बारे जानकारी सांझी कीती। चुग होरें सिंह होरें गी उंदे सफल ते प्रभावशाली कार्यकाल लेई शुभकामनां बी दितियां। उनें इब्बी आखेया जे प्रधानमंत्री नरेन्द्र मोदी हुंदे मार्ग-दर्शन ते नेतृत्व च श्री सिंह हुंदा व्यापक अनुभव- अनत्रुट वचनबद्धता ते सशक्त नेतृत्व पार्टी गी होर मजूबत करोग ते मणिपुर दी जनता दी आसें-तांगे गी पूरा करने च मददगार होग। ध्यानजोग ऐ जे मुक्खमंत्री दे औहदे थमां एन.बीरेन सिंह हुंदे इस्तीफे दे बाद मणिपुर च पिच्छले बारे फरवरी थमां गै राष्ट्रपति शासन लागू ऐ।



Encounter Udhampur

उधमपुर जिले च सुरक्षाबलें ते आतंकवादियें बश्कार इक टाकरा भखी पेया। इलाके च आतंकवादियें दी मौजूदगी बारे थहोई दी इक टकोहदी सूह पर कारवाई करदे होई सुरक्षाबलें आसेया सांझा तपाशी अभियान चलाया गया। व्हाईट नाइट कोर नै सोशल मीडिया दी इक पोस्ट च जानकारी दिती ऐ जे सेना दी CIF डेल्टा- जम्मू-कश्मीर पुलस ते सी.आर.पी.एफ आसेया सांझे तौरा पर अभियान चलाया गया। सुरक्षाबलें ते आतंकवादियें बश्कार कल संजा गोलीबारी होई। खीरी खबरां थहोने तगर दौने भेठा दा गोली बारी जारी ही।



PM-Pariksha Pe Charcha

प्रधानमंत्री नरेन्द्र मोदी होरें लोकें गी शुक्करवारें “परीक्षा-पे-चर्चा” कार्यक्रम गी दिक्खने दी गुज़ारश कीती ऐ। इक सोशल मीडिया पोस्ट च प्रधानमंत्री होरें आखेया जे युवाएं कन्नै गल्लबात करना- ऊर्जा कन्नै भरोचे दा रेहा ऐ। उनें म्तेहान देन आलें विद्यार्थियें गी तनाऽ रैहत होइयै म्तेहान देने- चुनौतियें कन्नै निब्बड़ने दे बवहारिक तरीके अपनाने- तालमेल स्थापत करने ते आत्मविश्वास बधाने पर जोर दिता। श्री मोदी होरें दस्सेया जे इस बारे म्तेहान देने आलें विद्यार्थियें कन्नै देवमोगरा- कोयंबटूर- रायपुर- गुवाहाटी ते उन्दे अधिकारिक आवास 7 लोक कल्याण मार्ग दिल्ली च महत्वपूर्ण सत्र आयोजित कीते जागंन।



WPL-Cricket

महिला प्रीमियर क्रिकेट लीग च कल एलिमिनेटर मुकाबले च दिल्ली कैपिटल्स नै बडोदरा च गुजरात बनाई लैती। 169 रन्ज दा लक्ष्य दिल्ली कैपिटल्स नै 15 ओवर ते 4 गेंदें च 3 विकेट दे नुकसान पर 169 रन्ज बनाइयै हासिल करी लैता। दिल्ली आस्तै लिज़ेल ली नै 43 ते कप्तान जेमिमा रोड्रिग्स नै 42 रन्जा दा योगदान दिता। रोड्रिग्स गी “प्लेयर ऑफ द मैच” चुनेया गया। फाईनल मैच वीरवारें दिल्ली कैपिटल्स ते रॉयल चैलेंजर्स बेंगलुरु कन्नै होग। जायंट्स गी 7 विकेट कन्नै हराइयै फाईनल च थाहर



U-19 World Cup Cricket

U-19 इक रोजा क्रिकेट विश्व कप दे दुए सैमीफाईनल च अज्ज भारत दा मुकाबला अफगानिस्तान कन्नै होगा। एह मैच भारतीय समें मूजब दपैहरी इक बजे थमां खेडेया जाग। इस मैच च विजेता दा मुकाबला शुक्रवारें फाईनल च इंग्लैंड कन्नै होगा। भारतीय टीम अजे तगर इस प्रतियोगिता च कोई बी मैच नेंई हारी ऐ। U-19 विश्व कप दे इतिहास च सब्बनें थमां सफल टीम भारत ऐ। भारत नै 5 बारी 2000-2008-2012-2018 ते 2022 च विश्व कप दा खिताब जितेया हा।



Weather

मौसम विभाग नै जम्मू-कश्मीर च अगले इक हफ्ते तोड़ी मौसम आमतौर पर खुशक रौहने दी पेशगोई कीती ऐ पर उच्चियें धारें पर मौसम च किश बदलाव होई सकदा ऐ। विभाग नै अज्ज गास आमतौर पर साफ रौहने दी पेशगोई कीती ऐ पर 6 फरवरी गी रातीं लै उच्चियें धारें पर किश थाहरें हलकी बर्फबारी होई सकदी ऐ। 7 ते 8 फरवरी गी मौसम आमतौर पर साफ रौहग उआं 9 ते 10 फरवरी गी किश थाहरें पर हलकी बरखा ते बर्फबारी होई सकदी ऐ। 11 ते 12 फरवरी थमां मौसम फही आमतौर पर खुशक गै रौहग।

